

ԽՈՒՍՏԱՍԽԱՆԱԿԱՆՈՒԹՅԱՆ

ՍԱՄՎԵԼ ՊՈՂՈՍՅԱՆ

Պարմական գիտությունների թեկնածու

ՆԱՅԿԱԿԱՆ ԼԵԳԵՈՆԸ ԱՌԱՋԻՆ ԱՇԽԱՐՀԱՄԱՐՏԻ ՏԱՐԻՆԵՐԻՆ

Առաջին համաշխարհային պատերազմի տարիներին Ֆրանսիան Կիպրոսում հայ եւ սիրիացի կամավորներից կազմավորեց Արեւելյան լեգեոնը: Այն կազմված էր գլխավորապես հայերից եւ մասնակցեց թուրքերից Պաղեստինի, Լիբանանի, Սիրիայի ու Կիլիկիայի ազատագրմանը:

Լեգեոնի կազմավորումը սկսվեց 1916թ. վերջերից, սակայն նման գործառնություն ստեղծելու հարցը քննարկման առարկա էր դեռեւս 1914-ից: Նայ տարբեր քաղաքական ու հասարակական գործիչներ պատերազմը սկսվելուց հետո Ֆրանսիայի, Անգլիայի, Ռուսաստանի ներկայացուցիչների հետ բանակցություններ էին վարում հայկական կամավորական բանակ ստեղծելու հարցի շուրջ, որը պետք է ազատագրեր Կիլիկիան եւ տեղի հայությանը փրկեր կոտորածներից¹:

1915թ. փետրվար-մարտ ամիսներին Սոֆիայում Ռուսաստանի, Ֆրանսիայի ու Անգլիայի դեսպանների հետ ՆՅԴ Արեւմտյան բյուրոյի անունից բանակցություններ սկսեց Մ. Վարանդյանը: Նա նշում էր, որ եթե դաշնակիցները ցանկանան ափհանում կատարել Ալեքսանդրեպոլի ծոցում կամ Ադանայում, ապա հայերը պատրաստ են օժանդակելու նրանց: Նա առաջարկում էր Ամերիկայում, Բալկաններում ու եւրոպական այլ երկրներում հավաքագրել մոտ 20.000 հայ կամավորների եւ կենտրոնացնել Կիպրոսում: Անգլո-ֆրանսիական կողմը պետք է զինել ու մարզեր նրանց եւ օգտագործեր Կիլիկիայում ափհանում կատարելու համար: Չնայած դեսպանները հավանություն տվեցին այդ նախագծին ու ներկայացրին իրենց կառավարություններին, բայց Ֆրանսիայի ընդդիմության հետեւանքով այդ ծրագիրը չիրագործվեց²:

1915թ. ապրիլին ԱՄՆ-ում անգլիական դեսպան Ս. Ռայսը տեղի ռուսական դեսպանից տեղեկացավ, որ ամերիկահայերը պատրաստ են Կանադայի վրայով 1.000 կամավորներ ուղարկել Կիլիկիայում կռվելու համար: Նայերը նույնիսկ պատրաստ էին վճարել իրենց ռազմական հանդերձանքի եւ մինչեւ Կանադա տեղափոխության ծախսերը՝ հուսալով, որ Անգլիան իր վրա կվերցնե նրանց տեղափոխությունը մինչեւ Կիլիկիա: Ապրիլի 25-ին այս առաջարկն ուղարկվեց Անգլիայի արագործնախարարություն, սակայն հաջորդ օրը Բանակային խորհրդում մերժվեց³:

1 ՆԱԱ, ֆ. 57, ց. 5, գ. 19, թ. 68: Boghos Nubar's Papers and the Armenian Question 1915-1918. Documents, Waltham, 1996, p. 3-5.

2 Ա. Պեյլերյան, Մեծ տերությունները, Օսմանյան կայսրությունը եւ հայերը ֆրանսիական արիսիվներում (1914-1918), հ. I, Երևան, 2005, էջ 78-80:

3 Տ. Սարուխանյան, Նայոց ցեղասպանությունը Օսմանյան Թուրքիայում եւ Մեծ Բրիտանիան (1915-1918թթ.),

1915թ. հուլիսին Եգիպտոսի անգլիական զինված ուժերի գլխավոր հրամանատար գեներալ Ջոն Մաքսվելին եգիպտահայերն առաջարկեցին Կիպրոսում կենտրոնացնել հայ կամավորներ եւ այնպեղից ռազմական գործողություններ սկսել Կիլիկիայի ուղղությամբ, որի շնորհիվ Կիլիկիայի հայությունը կփրկվեր կոտորածներից, իսկ թուրքերի հաղորդակցության ուղիները կխափանվեին⁴:

Ըստ այդմ Կիպրոսում կազմավորվելու էր 10000-ոց հայկական կամավորական զորամաս, որի ծախսերը հոգալու էին հայերը, իսկ անգլիացիները ապահովելու էին սպաներով, ռազմամթերքով, օժանդակելու էին փոքրաթիվ ցամաքային ու ծովային ուժերով: Նայերը ապստամբություն կազմակերպելու նպատակով զենք ու դրամ էին տեղափոխելու Կիլիկիայի ծովափնյա շրջանները: Այս հայկական այդ բանակը եւ նույնքան էլ անգլիական զինվորներ գրավելու էին Ալեքսանդրեպոլ, Ադանան, Մերսինը: Նախատեսվում էր, որ նրանց կմիանան 25.000 հայ ապստամբներ Կիլիկիայից եւ 10.000՝ շրջակայքից: Այդ մոտ 50.000-անոց բանակը բավարար էր համարվում ոչ միայն Կիլիկիան ազատագրելու, այլեւ շարժվելու նրա սահմաններից դուրս: Անհրաժեշտ էր գործողությունն իրականացնել արագորեն՝ կիլիկիահայությանը կոտորածներից ու տեղահանությունից փրկելու համար:

Եթե անգլիացիները անհրաժեշտ համարեին ավելի փոքրամասշտաբ գործողություն, ապա առաջարկվում էր հավաքագրել միայն 5.000 կամավորների: Այդ զորքը կարող էր մի կողմից գրավել Սուեիիան (Մուսա լեռան շրջակայքը) եւ Քեսապը, ուր կար 25000 հայ, մյուս կողմից՝ Դյորթ Յուլը Ալեքսանդրեպոլի ծոցում, ուր կհավաքվեին եւ արդյունավետ դիմադրություն կկազմակերպեին շրջակայքի հայերը: Այդ գործողությունների արդյունքում կարող էին գրավել Ալեքսանդրեպոլ ու Բեյլանի կիրճը: Անհաջողության դեպքում կարող էին ուժերը կենտրոնացնել լեռներում եւ պարսիզանական պայքար մղել: Նրանք կխախտեին թշնամու հաղորդակցությունը՝ կտրելով հեռագրալարերը, այրելով կամուրջները եւ այլն:

Նուլիսին Լոնդոնի ռուսական դեսպանությունը ,ւս Անգլիայի արագործնախարարությանն առաջարկեց դեպի Կիլիկիա հայկական ուժերով արշավանք կազմակերպել⁵: Ռուսաստանն ամեն կերպ խրախուսում էր Անգլիային Կիլիկիայում ռազմական գործողություններ սկսելու հարցում, որպեսզի ինչքան հնարավոր է նրա ուշադրությունը շեղի Կ. Պոլսից ու նեղուցներից, ինչպես նաեւ թուլացնի թուրքական բանակի ճնշումը Կովկասյան ճակատում:

Սակայն այդ ծրագրերն ուշացած էին եւ կիլիկիահայության տեղահանությունից հետո դրանք անիրագործելի դարձան:

Հայկական զորամաս կազմավորելու նոր հեռանկար բացվեց, երբ մուսալեռցիները հերոսական ինքնապաշտպանությունից հետո 1915թ. սեպտեմբերին փրկվեցին ֆրանսիական նավաբորմի կողմից եւ ապաստան գտան Պորտ Սալիդում: Նրանք բազմիցս դիմեցին անգլո-ֆրանսիական իշխանություններին, որպեսզի իրենց զենք տան եւ ուղարկեն կռվելու թուրքերի դեմ⁶:

Արդեն սեպտեմբերի 19-ին Կահիրեի ֆրանսիական դեսպան Ա. Դեֆրանսը իր կառա-

Երեւան, 2005, էջ 59:

4 "Boghos Nubar's Papers and the Armenian Question 1915-1918". Documents, 1996, pp. 194-195, 203-204.

5 Տ. Սարուխանյան, նշվ. աշխ., էջ 60:

6 Ս. Պարթևեան, Արարա: Հայկական լեզունը, Իզմիր, 1919, էջ 59-60:

վարությանը հեռագրեց, որ կարող են մուսալեոցիներից հավաքագրել 500 լավ զինվորներ: Նա փեղեկացրեց նաեւ, որ Ջ. Մաքսվելը նախապես ունի հայկական լեզուն կազմել եւ այն համալրել ամերիկահայ կամավորներով: Լեզունի խնդիրն էր լինելու հարձակումներ կատարել ծովեզերքում, հատկապես Ալեքսանդրեյի շրջանում⁷:

Սեպտեմբերի 23-ին Ա. Դեֆրանսը նոր զեկուցագիր ուղարկեց, ուր նշում էր մուսալեոցիների կռվելու վճռականության մասին: Նայելը պարտասպանություն էին հայտնել Ֆրանսիայից օժանդակություն ստանալու դեպքում մոտ մեկ ամսվա ընթացքում կազմավորել 4.000-անոց կամավորական բանակ, ավիանում կատարել Ալեքսանդրեյի ծոցում, գրավել Բեյլանի ու Բաղչեի կիրճերը: Դրանք Ամանոսի լեռներով անցնող միակ ճանապարհներն էին, որոնցով կապվում էին Ադանայի ու Նալեայի նահանգները⁸:

Շուրջով Ջ. Մաքսվելը ,ւս ֆրանսիացիներին առաջարկեց հայերին զենք տալ եւ ուղարկել իրենց լեռները, որպեսզի ապստամբություն բարձրացնեն: Նա ցանկություն հայտնեց, որ Ֆրանսիան հայերի հարցը իր վրա վերցնի⁹: Դա պայմանավորված էր այն հանգամանքով, որ Կիլիկիան գտնվում էր ֆրանսիական շահերի գոտում:

1915 թ. նոյեմբերի 2-ին Միջերկրականի ֆրանսիական 3-րդ նավատորմի հրամանատար փոխծովակալ Մորոն ռազմածովային նախարարին ուղարկած փեղեկագրում հավաստիացնում էր, որ մուսալեոցիները քաջ ու կռվող ժողովուրդ են, առաջարկում էր նրանց զինել եւ փոքր դիվերսիոն արշավանքների ուղարկել թուրքական երկաթուղիների ուղղությամբ¹⁰: Այդ նպատակով ֆրանսիացի նավաստիները սկսեցին մարզել 250 մուսալեոցի կամավորների: Այդ գործը ստանձնեց ռազմածովային կապիտան, «Ժորեգիբերի» նավի հրամանատար Բենուա դ'Ազին, որի փեղակալ նշանակվեց Շառլ-Տիրան Թեքեյանը¹¹: Կարճ ժամանակում այդ վաշտը պարտասպ էր ռազմական գործողությունների: 1916 թ. հունվարի 11-ին Պորտ Սալիդի անգլիական զորքերի հրամանատար փոխգնդապետ Էլզուդին Մորոյի ուղարկած ճեպագրից փեղեկանում ենք, որ մուսալեոցիների մոտ կատարված զինվորագրումները գնահատելի արդյունքներ են ունեցել եւ սպասվում էր մոտ 500 կամավորների ժամանում նաեւ Ալեքսանդրիայից: Նման պայմաններում Մորոն անհրաժեշտ էր համարում այդ ուժերին անհապաղ զենք տրամադրելու եւ իր տրամադրության տակ դնելը¹²:

Այսպիսով՝ մուսալեոցիները դարձան այն հիմնական գործոնը, որի արդյունքում ֆրանսիական իշխանությունները սկսեցին լրջորեն քննարկել հայերի մարտական ուժն օգտագործելու հնարավորությունը: Մեծաքանակ հայկական զորամասի ստեղծման հարցը, այնուամենայնիվ, ռազմական ու քաղաքական նկատառումներով ձգձգվեց: Նայելի փեղահանությունից ու կոտորածից հետո այլեւս անիմաստ էր դարձել Կիլիկիա կատարելիք արշավանքը, եւ հայ գործիչներից շատերը նման պայմաններում դեմ էին հայկական կամավորական բանակի ստեղծմանը, որը, նրանց կարծիքով, թուրքերին առիթ կտար ոչնչացնելու

7 Ա. Պեյլերյան, նշվ. աշխ., էջ 157-158:

8 Նույն փեղում, էջ 179:

9 Ա. Գարամանուկեան, Նայկական լեզունը պարմական, իրաւական ու քաղաքական հարցերու լոյսին տակ եւ վաւերագրեր, Բէյրութ, 1974, էջ 63-64:

10 Նույն փեղում, էջ 65-66:

11 Շ.-Տ. Թեքեյան, Մուսա լեռան հայերի փրկությունը: Նիշողության էջեր, Երևան, 2002, էջ 51:

12 Ա. Պեյլերյան, նշվ. աշխ., էջ 249:

Սիրիայի անապարներում մնացած փարագրյալ հայերի բեկորները: Սակայն Ֆրանսիան Արեւելքում միայն աննշան ուժեր ուներ, մարդուժի կարիք էր զգում եւ, ի վերջո, որոշեց օգտագործել հայ կամավորներին: 1916 թ. մայիսին կնքված Սայքս-Պիկո-Սազոնով գաղտնի համաձայնագրով Ֆրանսիային էին անցնելու Սեբաստիան, Խարբերդը, Դիարբեքիրը, Կիլիկիան եւ Սիրիան, հետեւաբար, այդ ուղղությամբ գործելու պահին նրան անհրաժեշտ էր ավելի ներկայանալի ուժեր ունենալ փարաժաշրջանում:

1916 թ. հունիսի 28-ին Լոնդոնի Ֆրանսիական դեսպան Պ. Կամբոնը վարչապետ Ա. Բրիանին հեռագրեց, որ Անգլիայի ԱԳՆ-ում իրեն տեղեկացրել են, որ ամերիկահայերը առաջարկել են Միջագետքում գերված եւ Ննդկաստան տեղափոխված հայ ռազմագերիներին ընդգրկել դաշնակիցների բանակների մեջ: Քանի որ Սայքս-Պիկոյի համաձայնագրով Նայաստանի մի մասը եւ Կիլիկիան անցնելու էին Ֆրանսիային, այդ պարճառով անգլիական կառավարությունը ցանկացել էր իմանալ, թե արդյոք Ֆրանսիան կցանկանար օգտվել այդ հայերի ծառայություններից¹³: 1916թ. հուլիս-սեպտեմբեր ամիսներին Ֆրանսիայի արտաքին գործերի եւ ռազմական նախարարությունները մանրամասնորեն քննարկեցին Կիպրոսում 5000-ով հայկական զորամաս կազմավորելու հարցը: Այդ ժամանակաշրջանում Ֆրանսիան արեւելքում միայն փոքրաթիվ ուժեր ուներ եւ հայ կամավորների օգնության կարիքը շար էր զգում:

Կիպրոսում հայ կամավորներ մարզելու համար իր համաձայնությունը տվեց նաեւ Անգլիան: Այս ընթացքում Եգիպտոսում կային մոտ 400 մուսալեոցի կամավորներ, որոնք մարզվել էին Ֆրանսիացի ծովայինների կողմից¹⁴: Առաջին գումարտակը կազմվելու էր մուսալեոցի ու եգիպտահայ կամավորներից: Նարցը տեղում պարզելու համար սեպտեմբերին Ալեքսանդրիայում եգիպտահայ համայնքի ղեկավարներից Մ. Տամարյանի եւ Լ. Մկրտիչյանի հետ բանակցությունների մեջ մտավ Մեքքա մեկնող Ֆրանսիացի փոխգնդապետ Է. Բրենոնը: Նա տեղեկացրեց հայկական լեգեոն ստեղծելու Ֆրանսիայի որոշման մասին՝ նշելով, որ այն նախատեսվում է օգտագործել Կիլիկիան ազատագրելու համար: Եգիպտահայերը պարտասպանականություն հայտնեցին մասնակցել կամավորագրությանը, եթե իրենց դիմի Նայ ազգային պարվիրականության նախագահ Պողոս Նուբար փաշան եւ խորհուրդ տվեցին, որ Ֆրանսիական կառավարությունը բանակցի անմիջականորեն նրա հետ¹⁵:

Սեպտեմբերի վերջին Ֆրանսիայի ռազմական նախարար Ռոբը Եգիպտոս գործուղեց հետեւակային գումարտակի հրամանապար Ռոմիոյին, որը պետք է տեղում պարզեր հայկական զորամասի ստեղծման նպատակահարմարությունն ու պայմանները, համաձայնության էր գալու անգլիացիների հետ, ուսումնասիրելու էր զինվորագրման ենթակա հայերի թիվը, Կիպրոսում հարմար վայր էր գտնելու զորամասի տեղակայման համար, ապա իր վերջնական առաջարկներն էր ներկայացնելու նախարարին¹⁶:

Նոյեմբերի 2-ին Փարիզում, Ֆրանսիայի ԱԳՆ Արեւելյան գործերի բաժնի պետ Ժ. Գուն լեգեոնի հարցով բանակցություններ սկսեց Պ. Նուբարի հետ: Ժ. Գուն տեղեկացրեց Կիպրոսում Ֆրանսիացի սպաների հրամանապարության տակ հայկական զորամաս կազ-

13 Ա. Պեյլերյան, նշվ. աշխ., էջ 308:

14 Ա. Գարամանուկեան, նշվ. աշխ., էջ 68-69:

15 Մ. Տամարյան, Իմ յուշերես, Բեյրութ, 1985, էջ 106:

16 Ա. Պեյլերյան, նշվ. աշխ., էջ 342-343:

մավորելու Ֆրանսիայի մրադրության մասին, որն օգտագործվելու էր Կիլիկիա կամ Սիրիա ներխուժելու դեպքում: Նա Պողոս Նուբարի աջակցությունը խնդրեց մեծ թվով կամավորներ հավաքագրելու համար, քանի որ մի քանի հարյուր մուսալեոցիները բավարար չէին: Պ. Նուբարը մրավախություն հայտնեց, որ հայերի կամավորագրությունը թուրքերին նոր կոտորածներ կազմակերպելու առիթ կտար եւ պահանջեց դա կատարել խիստ գաղտնի, ինչպես նաեւ անհրաժեշտ համարեց դրա դիմաց Կիլիկիային ինքնավարություն խոստանալ: Գուն պարասիսանեց, որ Ֆրանսիան մրադիր է ժողովրդավարական վարչաձեւ պարգեւել Կիլիկիային, իսկ ոստիկանական եւ վարչական պաշտոնները տրվելու են հայ կամավորներին¹⁷:

Նոկտեմբերի 6-ին Պ. Նուբարը կամավորների խնդրի վերաբերյալ նամակ ուղարկեց եգիպտահայերին՝ զգուշացնելով, որ տեղի թերթերը գաղտնի պահեն հարցը, իսկ կամավորները հավաքագրվեն ոչ թե Եգիպտոսում, այլ Կիպրոսում: Նա դեռ հույս ուներ, որ հայերից առանձին գործառն չեն կազմի եւ նրանց կընդգրկեն դաշնակիցների զորքերի մեջ: Պ. Նուբարը նաեւ հույս էր հայտնում, որ, ի տարբերություն հայերի հանդեպ իր քաղաքականությունը փոխած Ռուսաստանի, Ֆրանսիան պատերազմից հետո լիբերալ վարչաձեւ է շնորհելու իրեն անցած հայկական տարածքներին եւ հնարավորություն կտա հայերին իրագործելու ազգային երազանքները¹⁸:

Լեգեոնի կազմավորման վերաբերյալ վերջնական համաձայնություն կայացնելու համար Ֆրանսիական կառավարության ներկայացուցիչ Ժորժ Պիկոն Պ. Նուբարին առաջարկեց հանդիպել Լոնդոնում: Նոկտեմբերի 24-ին Պ. Նուբարը Լոնդոնում հանդիպեց անգլիական կառավարության ներկայացուցիչ Մարկ Սայքսի հետ: Վերջինս տեղեկացրեց գաղտնի համաձայնագրով (Սայքս-Պիկոյի համաձայնագիր-Ս.Պ.) Նայաստանը Ֆրանսիայի եւ Ռուսաստանի միջեւ բաժանելու մասին: Մ. Սայքսը նշեց, որ Ֆրանսիայի հովանու ներքո կստեղծվի ինքնավար Նայաստան, եւ հայերն ավելի մեծ իրավունքներ ապահովելու համար պետք է կազմավորեն բանակ¹⁹:

Նույն օրը Պ. Նուբարը Ֆրանսիական դեսպանատանը հանդիպեց Ժ. Պիկոյի հետ: Վերջինս նշեց, որ Ֆրանսիան ինքնավարություն կտա Կիլիկիային, որին կմիացվեն նաեւ Սեբաստիան, Դիարբեքիրը, Խարբերդը եւ Ալեքսանդրեպի նավահանգիստը: Նա խոստացավ, որ Նայաստանում բոլոր պաշտոնները հանձնվելու են հայերին, բացի նահանգապետից, որը լինելու էր եվրոպացի: Նա հայտնեց, որ ինքնավարություն ստանալու համար հայերը պետք է դիմեն որոշ գոհողությունների՝ կազմավորեն կամավորական բանակ: Թուրքերին չգրգռելու համար Պ. Նուբարն առաջարկեց, որ Ֆրանսիական կառավարությունը հայտարարի Արսասահմանյան լեգեոնում հայ կամավորների գերազանց մասնակցության մասին եւ նոր կամավորագրության կոչ անի, որից հետո Նայ ազգային պարմիրակությունը կամավորագրությունը խրախուսելու քայլեր կձեռնարկի: Նայ գործիչը նաեւ պահանջեց, որ Ֆրանսիան քայլեր ձեռնարկի լեգեոնի մեջ մտնելու Սիբիրում գտնվող մոտ 5000 արեւմտահայ ռազմագերիներին: Ժ. Պիկոն խոստացավ ուսումնասիրել առաջարկները եւ պարասիսանել հաջորդ հանդիպման ժամանակ²⁰:

17 Boghos Nubar's Papers and the Armenian Question 1915-1918, pp. 368-370.

18 Նույն տեղում, էջ 372-374:

19 Նույն տեղում, էջ 382-383:

20 Նույն տեղում, էջ 384-386:

Նոկտեմբերի 27-ին մինչև Ժ. Պիկոյի մոտ գնալը Պ. Նուբարը հանդիպեց Մ. Սայբսին՝ վերջինիս նախաձեռնությամբ: Մ. Սայբսը առաջարկեց պահանջել, որ կամավորներին վճարեն, երաշխիքներ տան, որ նրանք չեն ուղարկվի Ֆրանսիական ճակատ էլ կկռվեն միայն հայրենիքում, վիրավորներին ու հիվանդներին բուժեն ամերիկյան Կարմիր խաչի կենտրոններում, քանի որ Ֆրանսիացիները լավ չէին բուժում: Մ. Սայբսը կարծիք հայտնեց, որ եթե Ֆրանսիան կարողանա ապահովել հայ քաղաքական ուժերի համագործակցությունը, ապա հնարավոր կլինի մինչև 1917թ. հունիս-հուլիս ամիսները հավաքել 30000 հայ կամավորներ: Մ. Սայբսը պարզաբանեց, որ Ժ. Պիկոն չի մերժի այդ պայմանները, քանի որ Ֆրանսիան մարդու լարիք ուներ:

Պ. Նուբարը տեղեկացրեց, որ Ժ. Պիկոյից պահանջել է, որ Ֆրանսիական կառավարությունը իր պաշտոնաթերթում հայտարարի Արտասահմանյան լեգեոնում հայ կամավորների խրախուսելի մասնակցության էլ նոր կամավորագրության մասին: Մ. Սայբսը խորհուրդ տվեց դրա փոխարեն պահանջել, որ Ազգային ժողովում վարչապետը հայտարարի, որ պատերազմից հետո Ֆրանսիան բավարարելու է հայկական պահանջները ել դրականորեն արտահայտվի հայ կամավորների մասին²¹:

Ապա Պ. Նուբարը, Ն. Մոսպիջյանը, Ջ. Մալբուրն²² եւ Մ. Սայբսը մեկնեցին Ժ. Պիկոյի մոտ: Երկար քննարկումից հետո նրանք համաձայնության եկան հետեւյալ պայմանների շուրջը.

1. Ֆրանսիայի կառավարությունը պետք է հրապարակի կամավորագրության կոչ, իսկ Ժ. Պիկոն ապահովելու է հայտարարություն վարչապետ Ա. Բրիանի կողմից:
2. Ժ. Պիկոն եւ Մ. Սայբսը անհրաժեշտ քայլեր են ձեռնարկելու Ռուսաստանում գտնվող հայ ռազմագերիների եւ արեւմտահայերի կամավորագրությունը ապահովելու համար:
3. Ամերիկայում կամավորների հավաքագրումը կարարվելու է Կանադայում, եւ Ֆրանսիան ապահովելու է նրանց տեղափոխության ծախսերը:
4. Ժ. Պիկոն փորձելու է ապահովել, որ հայ կամավորները սրանան օրական մեկ դոլար:
5. Կամավորները չեն կռվելու եվրոպական որեւէ ճակատում եւ օգտագործվելու են միայն Ասիական Թուրքիայում ափհանում կարարելիս՝ կռվելու իրենց դարավոր թշնամու դեմ եւ ազատագրելու իրենց հայրենիքը:
6. Ֆրանսիան երաշխավորելու է հաղթանակից հետո իր հովանու ներքո ինքնավարություն շնորհել Կիլիկիային, Սեբաստիային, Դիարբեքիին եւ Խարբերդին:
7. Պ. Նուբարը հեռագիր էր ուղարկելու Եգիպտոս՝ խրախուսելու կամավորագրությունը՝ ըստ որոշված պայմանների²³:

Նաջորդ օրը Պ. Նուբարը հեռագիրը ուղարկեց Կահիրե՝ տեղեկացնելով, որ անհրաժեշտ է խրախուսել եւ աջակցել կամավորագրությանը, սակայն պահպանելով որոշակի զգուշություններ²⁴: Այդ հեռագրից հետո Եգիպտոսում մեծ խանդավառությամբ սկսվեց կա-

21 Boghos Nubar's Papers and the Armenian Question 1915-1918, pp. 391-392:

22 Ն. Մոսպիջյանը Ազգային պարվիրականության անդամ էր 1913-ից, իսկ Մալբուրնը՝ 1917թ. հունվարից:

23 "Boghos Nubar's Papers and the Armenian Question 1915-1918", pp. 393-397.

24 Տ. Պոյաճեան, Հայկական լեգեոնը, Բոստոն, 1965, էջ 8-9:

մավորագրությունը: Իսկ գնդապետ Ռոմիեռն²⁵ նոյեմբերին եգիպտահայերին տեղեկացրեց Լոնդոնի համաձայնության մասին եւ կարդաց վարչապետ Ա. Բրիանի նամակը, որը հայտնում էր, թե ամբողջովին համաձայն է Պ. Նուբարի պայմաններին²⁶:

1916թ. նոյեմբերի 15-ին Ֆրանսիայի ռազմական նախարարը հրամանագիր ստորագրեց Արեւելյան լեզեռն կազմավորելու մասին²⁷, որի կանոնադրությունը նախարարը հաստատեց նոյեմբերի 26-ին²⁸: Նրանում ընդգրկվելու էին հայեր եւ սիրիացիներ: Լեզեռնը Արեւելյան կոչվեց հայկական կողմի պահանջով, որպեսզի շեղի թուրքերի ուշադրությունը, սակայն իրականում այն հայկական էր, քանի որ սիրիացիների թիվը չէր անցնում 20%-ից:

Լեզեռնի կազմավորման եւ կամավորագրության պայմանները Ֆրանսիայի ԱԳՆ կողմից հրապարակվեցին դեկտեմբերի 5-ին: Ըստ դրա՝

1. Արեւելյան լեզեռնին կամավորագրվելու էին օսմանահայապակ հայերն ու սիրիացիները, որոնք առանձին խմբերի մեջ էին դասավորվելու ըստ ցեղի եւ կրոնի:

2. Լեզեռնի ծախսերը հոգալու է Ֆրանսիան, սակայն լեզեռնականները օժանդակ զինվորներ են լինելու եւ մաս չեն կազմելու Ֆրանսիական բանակին, իսկ վիրավորվելու դեպքում հաբուցում կամ թոշակ չեն ստանալու:

3. Լեզեռնը հաստատվելու է Կիպրոսում եւ ղեկավարվելու է Ֆրանսիացի սպաների կողմից:

4. Լեզեռնը նախատեսված է օգտագործելու Ասիական Թուրքիայում եւ դրվում է Սիրիայի Նավային գորաբաժնի ծովակալի հրամանադրության տակ:

5. Արձանագրության համար կամավորները պետք է ներկայանան Մարսելի կամ Բորդոյի գրասենյակները, իսկ Ֆրանսիայում բնակվողները՝ Փարիզի կենտրոնական գրասենյակ: Արեւելքից եկողները պետք է արձանագրվեն Պորտ Սալիդի Ֆրանսիական հյուպատոսարանում կամ Կիպրոսում՝ լեզեռնի հրամանատարի գրասենյակում:

6. Հայկական եւ սիրիական կոմիտեները ստանձնելու են կամավորներ հավաքելու գործը՝ առանց Ֆրանսիական դիվանագետների միջամտության: Անհրաժեշտ է քարոզչությունն իրականացնել ամենաձայրահեղ զգուշությամբ եւ առանց հրապարակային որեւէ արտահայտության, որպեսզի խուսափեն թուրքերի ուշադրությունից եւ վրեժխնդրական արարքներից՝ ընդդեմ հայերի ու սիրիացիների:

7. Կամավորների ճանապարհաժախսը հոգալու են կոմիտեները, իսկ Ֆրանսիան պարավորվում է վերադարձնել կամավորների երրորդ եւ չորրորդ կարգի ճանապարհաժախսերը, եթե կոմիտեները պահանջեն:

8. Արձանագրության օրից կամավորի բոլոր ծախսերը հոգալու է պետությունը:

9. Կամավորներն ընդունվելու են պատերազմի ողջ տևողության համար²⁹:

Պ. Նուբարը բողոքեց վերոնշյալ պայմանների դեմ, քանի որ դրանցում ուրնահարված էին Լոնդոնում ձեռք բերված հիմնական սկզբունքները: Ըստ պայմանավորվածության՝

25 Ռոմիեռն Հայկական լեզեռնի առաջին հրամանատարն էր, իսկ 1919 թ. մայիսին նրան փոխարինեց գնդապետ Ֆլի-Սեյնթ Մարին:

26 «Յուշամատենան Մեծ Եղեռնի. 1915-1965», Բեյրութ, 1965, էջ 964:

27 Ա. Գաբամանուկեան, նշվ. աշխ., էջ 42:

28 Նույն տեղում, էջ 46:

29 Տ. Պոյաճեան, նշվ. աշխ., էջ 9-15:

Ֆրանսիական կառավարությունն ինքը պետք է կամավորագրության կոչ աներ, իսկ հայկական կոմիտեները աջակցելու էին ոչ բացահայտ: Պ. Նուբարը բարձրացրեց նաև Նայասրանին ինքնավարություն տալու մասին հայտարարության հարցը: Ֆրանսիայի ԱԳՆ-ում նրան պատասխանեցին, որ Ֆրանսիան չի կարող կամավորագրությանը պաշտոնապես աջակցել, քանի որ 1915թ. օգոստոսի 16-ի օրենքի համաձայն օսմանահպատակներին արգելվում էր ծառայել Ֆրանսիական բանակում, ինչպես նաև վստահեցրին, որ Նայասրանը Ֆրանսիայի հովանու ներքո կստանա ամենալայն ինքնավարություն եւ Ալժիրի կամ Թունիսի պես չի վերածվի գաղութի, քանի որ հայերը համարվում էին Արեւելքում Ֆրանսիական քաղաքակրթության ու մշակույթի տարածման ջահակիրները: Ֆրանսիացիները նաև սպառնացին համաձայնության չգալու դեպքում գործել առանց հայկական կողմի կարծիքը հարցնելու³⁰: Պ. Նուբարը հանդիպեց նաև Ժ. Պիկոյի հետ եւ նշեց, որ հայերն անկայուն խոստումներով չեն բավարարվի եւ կամավորագրությունը խրախուսելու համար անհրաժեշտ է ինքնավարություն խոստանալ: Պիկոն պատասխանեց, որ Նայասրանին ամենալայն ինքնավարություն կտրվի³¹:

Այդպիսով, դեռևս լեգեոնը չկազմավորած Ֆրանսիան արդեն սկսել էր խախտել ձեռք բերված համաձայնությունները, իսկ Նայ ազգային պարվիրակությունը ստիպված էր համակերպվել եւ բավարարվել միայն խոստումներով:

1916 թ. նոյեմբերի 30-ին Կիպրոս մեկնեց հայ կամավորների առաջին խումբը: Կամավորները կենտրոնացվեցին Փամագուստայից մոտ 30 կմ հյուսիս գտնվող Մոնարկա բնակավայրում: Առաջին գումարտակը կազմավորվեց դեկտեմբերին՝ 600 մուսալեոցիներից ու 300 եգիպտահայերից: Մարտին նրանց միացան 236 հայ ռազմագերիներ, որոնք Միջագետքից Նոդկաստան էին տարվել, ինչպես նաև Սինայում գերված մի քանի խումբ հայեր³²: Անգլիայի՝ Նոդկաստանի գործերով նախարարությունը 1916 թ. հոկտեմբերի 24-ին տվել էր իր համաձայնությունը, որպեսզի Նոդկաստանում ներկալված հայ ռազմագերիները միանային Արեւելյան լեգեոնին³³:

Կամավորագրությանն աջակցելու նպատակով եգիպտահայ բոլոր հասարակական, քաղաքական ու կրոնական կազմակերպությունները միավորվեցին Ազգային միության մեջ՝ ցուցաբերելով ազգային համերաշխության գեղեցիկ օրինակ: Ազգային միությունը որոշեց ԱՄՆ ուղարկել պարվիրակություն, որպեսզի այնտեղ եւս համաձայնություն ստեղծեն հայկական կազմակերպությունների միջեւ ու խրախուսեն ամերիկահայերի կամավորագրությունը:

1917 թ. հունվարին եգիպտահայ պարվիրակներ Միհրան Տամադյանը (ռամկավար), Արտաշես Նանմյանը (դաշնակցական) եւ Սյուրեանուս Սապահ-Գուլյանը (ինչակյան) հասան Փարիզ: Պ. Նուբարը նրանց ներկայացրեց Ֆրանսիայի ԱԳՆ Արեւելյան գործերի գրասենյակի պետ Ժ. Գուին, որը խոստացավ հանձնարարագրեր ուղարկել ԱՄՆ-ի Ֆրանսիական հյուպատոսներին՝ աջակցելու հայ պարվիրակներին³⁴:

30 Boghos Nubar's Papers and the Armenian Question 1915-1918, pp. 411-418.

31 Նույն տեղում, էջ 422-424:

32 Գ. Լազեան, Նայասրան եւ Նայ Դարը (վաերագրեր), Կահիրե, 1946, էջ 191:

33 Տ. Սարուխանյան, նշվ. աշխ., էջ 67:

34 Մ. Տամարեան, նշվ. աշխ., էջ 106:

Պարվիրակներին մեծ ընդունելություն ցույց տվեցին Նյու Յորքի հայերը: Նրանք անմիջապես հանդիպման գնացին Նյու Յորքի ֆրանսիական հյուպարոսի մոտ: Վերջինս տեղեկացրեց, որ պարգամավորներին ցանկանում է տեսնել ֆրանսիական դեսպան Ժյուսկարանը: Վաշինգտոնում ֆրանսիական դեսպանը պարգամավորներին հայտնեց, որ տեղյակ է ֆրանսիայի ԱԳՆ եւ հայերի պայմանավորվածության մասին, որ ԱՄՆ-ում կամավորներ հավաքագրեն: Բայց դեսպանը նշեց, որ ֆրանսիական բանակի համար կամավորներ հավաքագրելը տվյալ պահին սխալ քայլ է, քանի որ կարող է գրգռել ամերիկացիներին: Նա խորհուրդ տվեց դա անել խիստ գաղտնիության պայմաններում, մինչեւ որ ԱՄՆ-ը պարերազմ կհայրաքարեր Գերմանիային, որից հետո ազատորեն կկարողանային կամավորներ հավաքել: Դեսպանը խորհուրդ տվեց որոշ ժամանակ սպասել եւ այդ ընթացքում մեկ մարմնի շուրջ համախմբել բոլոր հայերին: Նայ պարվիրակները թեւեւ բավական հիասթափվեցին այդ հրահանգներից, բայց խոստացան հետեւել դրանց³⁵:

1917 թ. մարտի 16-ին ԱՄՆ-ում եւս ստեղծվեց Ազգային միություն, որը կամավորագրության կոչով դիմեց ամերիկահայությանը: Մի քանի օրում ցուցակագրվեց 5000 երիտասարդ, որոնց թիվը հետագայում կրկնապատկվեց: Սակայն փոխադրամիջոցների պակասի պարճառով 1917 թ. հունիս-նոյեմբեր ամիսներին կարողացան փոխադրել միայն 1200 կամավորների³⁶ (ըստ Գ. Լազյանի՝ 1600-1700)³⁷: Նյու Յորքում հավաքված հազարավոր կամավորներին փոխադրելու համար ֆրանսիան տրամադրել էր միայն մեկ բեռնատար նավ, որը կարող էր տեղափոխել շաբաթը 70-80 կամավորների: Չնայած Ազգային միությունը եւ Ազգային պարվիրակությունը բազմիցս դիմեցին ԱՄՆ-ում ֆրանսիական դեսպանին եւ ֆրանսիայի ԱԳՆ-ին, որպեսզի ռազմական փոխադրանավ տրամադրվի, սակայն որեւէ արձագանք չստացան: Նման պայմաններում 4 ամսվա ընթացքում միայն 1200 կամավորների կարողացան ուղարկել ֆրանսիա³⁸:

Ինչպես տեսնում ենք, ֆրանսիական կառավարությունը զլացավ նույնիսկ ռազմական նավեր տրամադրել, որպեսզի հայ կամավորները մեկնեին կովելու ֆրանսիական դրոշի տակ: Նոգնելով սպասելուց՝ 1918 թ. սկզբներին մոտ 4000 ամերիկահայեր զինվորագրվեցին ԱՄՆ բանակին: 1918 թ. մարտի 15-ին Պ. Նուբարը նամակով խնդրեց ֆրանսիայի արագորձնախարարի միջնորդությունը, որպեսզի ԱՄՆ բանակի հայ կամավորները միացվեին Արեւելյան լեգեոնին³⁹:

Կամավորագրության կոչին արձագանքեցին նաեւ արգենտինահայերը, որոնք մոտ 150 կամավորներ ուղարկեցին ֆրանսիա՝ լեգեոնին միանալու համար⁴⁰:

Ֆրանսիայի Բորդո նավահանգստից կամավորներին գնացքով տեղափոխում էին Մարսել, այնտեղից՝ նավերով Պորտ Սալիդ, ապա՝ Կիպրոս: Այդ նավարկությունը վրանգնելով լեցուն էր, քանի որ գերմանական սուզանավերը Արլանտյան օվկիանոսում ու Միջերկրական ծովում հարվածում ու խորտակում էին հակառակորդ երկրների նավերը: Նայ

35 Մ. Տամարեան, նշվ. աշխ., էջ 108-110:

36 Շ. Թորոսյան, Կիլիկիայի հայերի ազգային-ազատագրական շարժումները 1919-1920, Երեւան, 1987, էջ 65:

37 Գ. Լազյան, նշվ. աշխ., էջ 191:

38 Մ. Տամարեան, նշվ. աշխ., էջ 115:

39 Ա. Գարամանուկեան, նշվ. աշխ., էջ 77:

40 Է. Մելքոնյան, Նայկական Բարեգործական Ընդհանուր Միության պարմություն, Երեւան, 2005, էջ 506:

կամավորներին Կոնստանդնուպոլսի «Ադմիրալ Օրլին» 1917թ. օգոստոսի 29-ին հունական Միլա կղզու մոտ ենթարկվեց գերմանական սուզանավի հարձակմանը եւ խորհրդակցեց: Բարեբախտաբար, օգնության հասած անգլիական նավին հաջողվեց կամավորներին անկորուստ հասցնել Միլա կղզի: Այնպեղից ամերիկահայերը մեծ զրկանքներով տասնօրյա նավարկությունից հետո հասան Պորտ Սալիդ: Նրանց Կոնստանդնուպոլսից Ֆրանսիական «Դեսսեքս» ռազմանավը, որը մասնակցել էր մուսալեռցիների փրկությանը⁴¹:

Ամերիկահայ կամավորներից Կիպրոսում կազմավորվեց երկրորդ գումարարկը: Երրորդ գումարարկը եւս կազմավորվեց Կիպրոսում 1917 թ. վերջերին՝ Պաղեստինում անգլիացիներին անձնատուր եղած հայ ռազմագերիներից⁴²: 1917 թ. մայիսին Ֆրանսիայի ռազմական նախարարը Արարատահմանյան լեգեոնի հայ եւ սիրիացի կամավորներին թույլ տվեց Կոնստանդնուպոլսից Արեւելյան լեգեոն⁴³:

Կիպրոսում մարզվելու ընթացքում հայ լեգեոնները պարեկում էին Նոռոսից մոտ 40 կմ հեռու գտնվող Քասթելորիզո կղզում: Այն թուրքական ափից հեռու էր 1500 մետր: Այդպեղի ամրությունները պաշտպանում էին Նայկական լեգեոնի եւ Ֆրանսիացի ծովայինների մեկական վաշտ⁴⁴: Այսպեղից հայ մարտիկները նաեւ մի շարք հաջող դիվերսիոն գործողություններ իրականացրին թուրքերի ծովափնյա հենակետերի դեմ:

1917 թ. հուլիսին Ֆրանսիական գեներալ Բայուն տեսչական այց կատարեց Արեւելյան լեգեոն, որն այդ պահին ուներ 6 հայկական եւ 1 սիրիական վաշտ՝ յուրաքանչյուրը 200 զինվոր: Գեներալը ստուգեց լեգեոնի մարտունակությունն ու կարգապահությունը եւ գոհ մնաց: Բայուն իր տեղեկագրում, սակայն, նշեց այդ փոքրաթիվ կամավորների օգտագործման անհնարինությունը լավ պաշտպանված Կիլիկիայի ու Սիրիայի ուղղությամբ, առաջարկեց մեծացնել կամավորների թիվը եւ օգտագործել Պաղեստինի ուղղությամբ հարձակման ընթացքում:

1917 թ. նոյեմբերի 23-ին Պ. Նուբարը եւ ռամկավար գործիչ, ճանաչված գրող Վ. Թեքելյանը հանդիպեցին Ֆրանսիայի ԱԳՆ քաղաքական փնտրենին, իրենց դժգոհությունը հայրենեցին Բայուի առաջարկի կապակցությամբ եւ պահանջեցին լեգեոնն օգտագործել միայն Կիլիկիայում կամ Սիրիայի հյուսիսում: Նրանք կրկին բարձրացրին պատերազմից հետո Նայասարանին ինքնավարություն շնորհելու վերաբերյալ Ֆրանսիական կառավարության կողմից հայտարարություն կատարելու անհրաժեշտությունը: Նախարարին ուղարկված զեկուցագրում քաղաքական փնտրենը եւս նշեց նման հայտարարության անհրաժեշտությունը, որպեսզի խուսափեն Անգլիայի դավերից, որը ձգտում էր չեզոքացնել 1916 թ. Սայքս-Պիկոյի համաձայնագիրը⁴⁵:

Սակայն Ֆրանսիական կառավարությունը այդպես էլ պաշտոնապես չհայտարարեց Նայասարանին ինքնավարություն տալու պայրաստականության մասին, իսկ ռազմական նախարարի 1918 թ. մարտի 23-ի հրամանով Արեւելյան լեգեոնը դուրս բերվեց ծովային ուժերի կազմից եւ դրվեց Պաղեստինի Ֆրանսիական զորախմբի տրամադրության տակ⁴⁶:

41 Մ. Թաթարեան, Կամավորի մը յուշերը, Անթիլիաս, 1960, էջ 10-12:

42 Գ. Լազեան, նշվ. աշխ., էջ 191:

43 Ա. Գարամանուկեան, նշվ. աշխ., էջ 81:

44 Շ.-Տ. Թեքելյան, նշվ. աշխ., էջ 65:

45 Ա. Գարամանուկյան, նշվ. աշխ., էջ 74-76:

46 Նույն տեղում, էջ 77:

1918 թ. ապրիլ-մայիս ամիսներին Կիպրոսից առաջին երկրորդ գումարարկները փեղափոխվեցին Պորտ Սալիդ եւ գորավարժություններ կադարեցին Իսմայիլիեի ու Մեճելեի մեջ՝ Սուեզի ջրանցքի մոտակայքում: Եգիպտոսում անգլո-ֆրանսիական զորքերի ընդհանուր հրամանարար անգլիական գեներալ Ալենբին բարձր գնահատեց լեգեոնի մարտունակությունը⁴⁷:

Պորտ Սալիդից լեգեոնը Քանթարա-Ռամլե-Լյուդ ուղիով մեկնեց Պաղեստինյան ռազմաճակար: 1918 թ. օգոստոսի 30-ին Արեւելյան լեգեոնը դիրքեր գրավեց Ռաֆաթ-Արարայի բարձունքների մոտ: Նրա դիմաց կանգնած էին գերմանական 701-րդ եւ 702-րդ գումարարկները⁴⁸:

Այս շրջանում անգլո-ֆրանսիական եւ թուրք-գերմանական բանակների շփման գիծն անցնում էր Երուսաղեմ ու Նաբլուս քաղաքների միջեւ ընկած շրջանով եւ ձգվում էր Նորդանան գետից մինչեւ Միջերկրական ծով: Դեռեւս 1918թ. մարտ-ապրիլ ամիսներին անգլիական զորքերը երկու անգամ փորձել էին ճեղքել հակառակորդի պաշտպանությունը եւ շարժվել հյուսիս, բայց անհաջողություն էին կրել: Դրանից հետո կողմերի միջեւ հարաբերական անդորր էր հաստատվել, եւ նրանք զբաղված էին ուժերը վերադասավորելով:

Անգլո-ֆրանսիական կողմը, խոշոր համալրումներ ստանալով, այս ճակատում կենտրոնացրեց 70000 զինվոր, 540 հրանոթ եւ ինքնաթիռներ: Այդ ուժերի դեմ կանգնած էր գերմանական գեներալ Լիման ֆոն Սանդերսի ղեկավարած «Յըլդըրըմ» (կայծակ) 30000-անոց զորամիավորումը, որի մեջ էին թուրքական 7-րդ, 8-րդ բանակները, 2-րդ բանակի մի մասը եւ գերմանական 7000-անոց մի զորամաս: Թուրքերը կրկնակի պակաս հրետանի ունեին: Թուրք-գերմանական հրամանարարությունը հույս ուներ կառչել Սամարիայի լեռնային բնական ու արհեստական ամրություններից եւ կասեցնել հակառակորդին⁴⁹: Թուրքիայի ռազմական նախարար Էնվերը պաշտպանական այդ հզոր գծի հետ մեծ հույսեր էր կապում եւ այն անվանում էր երկրորդ Դարդանել⁵⁰: Նա կարծում էր, որ այդպեղ եւս կկարողանան կասեցնել հակառակորդի մեծաթիվ ուժերին ինչպես Դարդանելի օպերացիայի ժամանակ:

1918 թ. սեպտեմբերի կեսերին որոշվեց ընդհանուր հարձակում սկսել Պաղեստինյան ռազմաճակատում: Նայկական լեգեոնը հանձնարարություն ստացավ գրոհել Ռաֆաթ-Արարայի բարձունքը, որը ռազմաճակատի ամենադժվար ու գրեթե անառիկ հատվածն էր: Մինչ այդ անգլո-ֆրանսիական զորքերը երեք անգամ փորձել էին գրավել այդ դիրքերը, բայց թշնամին եւր էր շարժել նրանց⁵¹: Անգլո-ֆրանսիական հրամանարարությունը մեծ կարեւորություն էր տալիս այդ բարձունքների գրավմանը, քանի որ ցանկանում էր հակառակորդի ուշադրությունը սեւեռել այդ հատվածի վրա, ապա հեծելագործով սրընթաց առաջանալ ծովափնյա Սարոնի դաշտավայրով:

Նայկական լեգեոնի աջ թևում կանգնած էին ալժիրյան, իսկ ձախ թևում՝ հնդկական զորամասերը: 1918 թ. սեպտեմբերի 18-ի երեկոյան լեգեոնի երկրորդ գումարարկը հրաման

47 Գ. Լազեան, նշվ. աշխ., էջ 192:

48 Նույն տեղում:

49 Շ. Թորոսյան, նշվ. աշխ., էջ 66-67:

50 Կամաուրը (Արարայի յաղթանակի 10-րդ տարեդարձի առթիւ), հրապարակութիւն Կահիրէի Նայկական Միութեան, Կահիրէ, 1928, էջ 34:

51 Խ. Աճեմեան, Նայկական լեգեոնը, «Նամագգային»-ի տարեգիրք, Բէյրութ 1953, էջ 73:

ստացավ նախապարասքավել հաջորդ օրվա գրոհին, որը փաստորեն առաջին լուրջ մարտական մկրտությունն էր լինելու հայ կամավորների համար: Լեգեոնի առաջին գումարտակը պահեստային ուժերի մեջ էր մնալու⁵²:

Ներաբրբիր է, որ թուրքերի վրա հոգեբանական ճնշում գործադրելու նպատակով հարձակման նախօրյակին անգլիական ինքնաթիռը թշնամու թիկունքում թռուցիկներ տարածեց, ուր գրված էր, որ նրանց դեմ կանգնած է հայկական 60000-ոց բանակ⁵³:

1918 թ. սեպտեմբերի 18-ին երեկոյան ժամը 9-ից անգլո-ֆրանսիական ուժերը մոտ երկու ժամ հրետակոծեցին հակառակորդի դիրքերը: Իսկ սեպտեմբերի 19-ի արշալույսին սկսվեց ընդհանուր հարձակումը: Նայկական լեգեոնը մի քանի ժամ տեսած համառ մարտերից հետո կարողացավ թուրքերին դուրս շարտել առաջավոր դիրքերից: Շարունակելով հաջող հարձակումը՝ հայ զինվորները գրավեցին նաեւ պաշտպանական երկրորդ եւ երրորդ գծերը: Թուրքերը փորձեցին հակադրոհ կազմակերպել, բայց հայ զինվորները կասեցրին թշնամու համառ գրոհները⁵⁴:

Նայկական լեգեոնի հաջողությունը նպաստեց անգլո-ֆրանսիական ուժերի հաղթանակին: Արարայի ճակատամարտից հետո թուրքերն այլեւս կազմակերպված դիմադրություն չկարողացան ցույց տալ, եւ նրանց ողջ ռազմաճակատը քայքայվեց:

Արեւելքում անգլո-ֆրանսիական զորքերի գլխավոր հրամանատար Ալենքին բարձր գնահատեց հայ կամավորների սխրանքը: Նոյեմբերի 12-ին Պ. Նուբարին ուղարկած հեռագրում ֆելդմարշալը նշում էր. «Նպարտ եմ, որ իմ հրամանատարության տակ ունեմ հայկական զորամաս: Նայերը փայլուն կերպով կռվեցին եւ մեծ մասնակցություն ունեցան իմ հաղթանակում»⁵⁵: Իսկ Եգիպտոսի Նայ ազգային միության ուղարկած շնորհավորանքներին Ալենքին պատասխանեց. «...հպարտ եմ այն իրողությամբ, որ Արեւելյան Լեգեոնի ձեր հայրենակիցները գործոն բաժին մը վերցուցին կռվին մեջ եւ մասնակից եղան մեր հաղթանակին»⁵⁶:

Նայ լեգեոնականներն Արարայի ճակատամարտում տվեցին 23 սպանված եւ 76 վիրավոր: Զոհվածների աճյունները թաղվեցին Ռաֆաթ գյուղի մոտ՝ եղբայրական գերեզմանում: Ներագայում Արարայում գոհված հերոսների աճյունները Եղիշե արքեպիսկոպոս Դուրյանի գործոն աջակցությամբ տեղափոխվեցին Երուսաղեմ, որտեղ Սիոն լեռան վրա 1927թ. ապրիլի 24-ին ՌԱԿ-ի Կահիրեի շրջանային վարչության նախաձեռնությամբ հուշարձան կանգնեցվեց հայ լեգեոնականների պատվին:

Լեգեոնը Արարայից շարժվեց հյուսիս եւ 1918 թ. հոկտեմբերի 1-ին մտավ Դամասկոս, 6-ին՝ Բեյրութ, 26-ին՝ Նալեպ: Նոյեմբերի 6-ին Կիպրոսից Բեյրութ հասավ նաեւ երրորդ գումարտակը: Բեյրութում մեծ թվով դիմումներ եղան կամավորագրվելու Արեւելյան լեգեոնին, եւ այնտեղ 800 հայ կամավորներից կազմավորվեց չորրորդ գումարտակը⁵⁷: 1918 թ. հոկտեմբերից լեգեոնը մտավ Արեւելքի ֆրանսիական զորախմբի կազմի մեջ:

52 Գ. Լազեան, նշվ. աշխ., էջ 192:

53 Մ. Թաթարյան, նշվ. աշխ., էջ 15:

54 Կամաուրը, էջ 42-43:

55 ՆԱԱ, ֆ. 200, ց. 1, գ. 131, թ. 14:

56 Մ. Տամարեան, նշվ. աշխ., էջ 123:

57 Գ. Լազեան, նշվ. աշխ., էջ 192:

Սիրիայում հայ զինվորները հանդիպեցին հայրենիք վերադարձող հազարավոր գաղթական հայերի, որոնք չափազանց թշվառ վիճակում էին: Տարագիրները, մոռանալով իրենց ծանր վիճակը, մեծ ցնծություն ապրեցին հաղթող բանակի շարքում տեսնելով հայ կամավորներին⁵⁸:

Պալեստինայում Թուրքիայի պարսությունն ակնհայտ էր, եւ 1918 թ. հոկտեմբերի 30-ին Մուդրոսում սպորադիկաձև զինադադարով թուրքերը անձնավորության ենթարկվեցին:

Զինադադարից հետո առաջին գումարտակն ուղարկվեց Ալեքսանդրետ: Դեկտեմբերի 16-ին երկրորդ եւ երրորդ գումարտակները Բեյրութից մեկնեցին Մերսին: Մի քանի օրից չորրորդ գումարտակն ուղարկվեց Ալեքսանդրետ, իսկ Առաջինը շարժվեց ավելի հյուսիս⁵⁹:

Ադանայում աքսորից նոր վերադարձած հայ բնակչությունը ցնծությամբ դիմավորեց լեզեռականների մուտքը քաղաք: Կիլիկիայի ազատագրումը կարարվեց հիմնականում Նայկական լեզեռնի ուժերով: Միայն 1919 թ. փետրվարին Կիլիկիա միայն անգլիական զորքեր, որոնք Ֆրանսիականով փոխարինվեցին նոյեմբերին: 1919 թ. մայիսի 28-ին Մերսինում ավերու եկած 250 աֆրիկացի զինվորները առաջին ֆրանսիական զինվորներն էին Կիլիկիայում⁶⁰:

Մուդրոսի զինադադարից հետո թե՛ լեզեռնի հայ սպաների, թե՛ Պ. Նուբարի կողմից դիմումներ եղան լեզեռնը կոչելու «Նայկական» եւ վերանայելու լեզեռնի կանոնադրությունը: Նայասարանի եւ Սիրիայի ֆրանսիական բարձրագույն կոմիսար Ժորժ Պիկոն եւս հավանություն տվեց Արեւելյան լեզեռնը բաժանելու հայկական եւ սիրիական մասերի: 1919 թ. հունվարի 18-ին ռազմական նախարարի հրամանով կազմավորվեց Նայկական լեզեռնը⁶¹: Բաժանումից առաջ Արեւելյան լեզեռնն ուներ հետեւյալ պարկերը. հայկական 4 գումարտակներ՝ 4124 զինվորներով եւ սիրիական մեկ գումարտակ՝ 698 զինվորով⁶²:

Նայկական լեզեռնի պաշտպանության ներքո Կիլիկիայի հայերը վերադարձան իրենց քանդված օջախները եւ նոր կյանք սկսեցին: Ներագայում հայ լեզեռներները կարեւոր դերակատարություն ունեցան քննալական թուրքերի դեմ կիլիկիահայերի մղած ինքնապաշտպանական մարտերում:

Չնայած Նայկական լեզեռնը ի վերջո լուծարվեց, եւ Ֆրանսիան ոչ միայն ինքնավարություն չտվեց Կիլիկիային, այլեւ 1921 թ. ուխտադրժորեն այն հանձնեց թուրքերին, սակայն Նայկական լեզեռնի ստեղծումը դրական երեւույթ էր, քանի որ նրա շնորհիվ հազարավոր հայեր փրկվեցին թուրքական յաթաղանից, իսկ հայերը մեկ անգամ եւս աշխարհին ներկայացան որպէս կռիվող ու գոյատևելու ընդունակ ժողովուրդ:

58 Մ Թաթարյան, նշվ. աշխ., էջ 20-21:

59 Գ. Լազյան, նշվ. աշխ., էջ 192:

60 Նույն տեղում, էջ 193:

61 Ա Գաբամանուկեան, նշվ. աշխ., էջ 83:

62 Նույն տեղում, էջ 44: